

## CRANN NOLLAG

**Pictiúr: Radharc:**

(a) Crann ag fás sa pháirc, Daidí á ghearradh; (b) an crann agus é maisithe sa seomra suite; Páid, Bríd, Nóirín, Mamaí; soilse, Nóirín ag lasadh an tsolais, cárta Nollag, bronntanas, bosca seacláide, blús, comhartha ceiste a chur sa chiorcal cainte de réir mar a oireann; Daidí ag teacht isteach.

Gníomhartha agus geáitsíocht a dhéanamh de réir mar a bhíona gá leo.

**CÉIM 1. CLOISTEÁIL AGUS AITHINT****Cuntas Reatha**

Bhí crann deas ag fás sa pháirc. Ghearr Daidí é. Thug na leanaí isteach sa seomra suite é.

**Agallamh**

NÓIRÍN: Cuir an cárta seo ar an gcrann, a Bhríd.

BRÍD: Maith go leor. Ach las an solas, más é do thoil é.

**Cuntas Reatha**

Bhí bronntanas ag Páid do Mhamaí. Chuir sé faoin gcrann é.

**Agallamh**

BRÍD: Bosca seacláide, an ea?

PÁID: Ní hea, ach blús deas bán.

**Cuntas Reatha**

Tháinig Daidí isteach.

**Agallamh**

PÁID: Nach bhfuil an crann go hálainn, a Dhaidí?

DAIDÍ: Tá, go deimhin. Beidh spórt againn go léir amárach.

**CÉIM 2. AITHRIS****CÉIM 3. ATHRÁ Ó SPREAGTHAIGH**

(a) Spreagthaigh shúl (mar atá i gCéim 1);

(b) Spreagthaigh chluas:

Inis dom faoin gcrann.

Céard a rinne Daidí?

Agus céard a rinne na leanaí?

Abair le Bríd an cárta a chur ar an gcrann, a “Nóirín”.

Freagair í, a “Bhríd”.

Agus abair léi an solas a lasadh.  
Bhí rud éigin ag Páid do Mhamaí?  
Céard a rinne sé leis?

Tá ceist agat faoin mbronntanas, a “Bhríd”?  
Freagair í, a “Pháid”.

Céard a tharla ansin?

Céard atá le rá agat faoin gcrann, a “Pháid”?  
Freagair é, a “Dhaidí”.  
Agus céard faoin spórt amárach?

#### CÉIM 4. CLEACHTADH MÚNLAÍ AGUS FOCLÓRA

1. *Thug siad isteach é.*

(*amárach, gach lá; níor, ar?: inné; ní, an?: gach lá; ní, an?: amárach*).

2. Bhí bronntanas ag Páid *do Mhamaí*.

(*mise,\* tusa, eisean, ise, sibh, iadsan, an buachaill*).

3. Bosca seacláide *an ea?*

Freagra: *Ní hea (is ea)*.

4. *Tháinig Daidí isteach.*

(*amárach; ní, an?: amárach; ní, an?: inné*).

#### CÉIM 5. SAORCHOMHRÁ CRUTHAITHEACH

1. Aithris ar an mbunchomhrá.

\*.i. “Bhí brontanas ag Páid *duit*”.

2. Scéal a chumadh:

*Chuir mé féin agus Daidí crann Nollag sa seomra suite . . .*

3. Dráma beag:

D’oscail Mamaí a bronntanas;  
*nó*

Thug Nóirín bronntanas léine do Dhaidí.

4. Scéal:

Bríd ag insint faoin mbronntanas a cheannaigh sí dá Mamaí.

5. Comhrá faoin bpictiúr agus ceisteanna ó pháistí ar a chéile agus ar an múinteoir.

#### Rann Ceoil (An ceol ar théip)

##### I

Tá crann beag Nollag sa bhosca,  
Nach deas an crann beag é?  
Las na leanaí na soilse  
Is chuir siad bronntanas fé.

##### II

D’oscail Mamaí an bosca  
An beart a thug Páid di,  
Bhí blús deas bán istigh ann,  
“Go raibh maith agat”, ar sí.

##### III

Beidh San Nioclás ag teacht anocht,  
Beidh balúin ag dul suas san aer,  
Beidh bronntanas ag gach éinne,  
Beidh spórt againn go léir.